

璩金鎮為正字○夜有氣如雲自西方至民方布天長四尺許
漸移東南方須臾而滅北方東方南方乾方坤方如火氣

丁巳兩司并啓李芑事不見○大司諫金澍等上劄曰人主之
好善非一而納諫為好善之最人主之失德非一而復諫為失
德之甚蓋以一身處之巍巍之上以一心運之茫茫之中而萬
機之所叢百職之所萃雖明智之君高世之見不能無一失故
必資夫庶明勵翼交修不逮猶木之從繩金之有礪然後可以
入於無過之地而治道成矣近來天災荐臻時變疊至年運凶
荒民人飢困邦本已搖國勢岌岌 殿下固當優容謹論延納
嘉言轉危作安綿國祚於無疆此其秋也經幄之臣臺諫之官
苟有論列非徒不見納又有詭譎之色嚴辭以拒之峻言以折
之言及於貴戚事涉於近習則雖論執逾年竟不俞允至於君
子小人之進退吾道異端之消長實是治亂存亡之大機而無
一事得蒙聽納朝廷之上士林之間莫不扼腕長嘆皆以為無
可奈何而日事齟齬以言為戒無激昂振勵之氣有委靡偷惰